

AKASHVANI AIZAWL

REGIONAL NEWS UNIT

REGIONAL NEWS BULLETIN

Tuesday, April 1, 2025 Time - 2:30pm - 2:35pm

EID-UL-FITR

Aizawl Mosque Committee leh Mizoram Muslim Welfare Society General Secretary Mohammad Mamon Majumdar chuan Mizorama hnathawh tum emaw hnathawka awm lai mek te tan Inner Line Permit (ILP) chu neih ngei ngei a tul a ni, a ti.

He thu hi Aizawl West-II Joint YMA Field, Vaivakawn a Muslim sakhaw zuitute'n Ramzan thla a an chawnghei tawp ni an lawmna, Eid-Ul- Fitr hmanna-ah sawiin Md. Mamon Majumdar chuan an awmna hmun ang zela insiamrem a tul thu leh ram dan an lo siam sa te chu zawm a pawimawh a, chu chu Quran ah pawh ziaak a ni a ti a. Aizawl West Joint YMA Chairman Pu Rohluipuia leh committe member-te chungah khelmual hman an phalsak chu lawmawm a ti a. Eid Ul-Fitr atana an mamawh anga Police te'n an buaipui chu lawmawm a tih thu a sawi.

Md Mamon Majumdar chuan kalkhawmte chu pathian tihna nena hun hmang chu thil pawimawh a ni, a ti a. Mizo mipui chungah pawh lawmthu sawiin an mamawh ang hnathawh tur an neih theihna chhan chu Mizo mipuite an ni a. Mizoram Muslim Welfare Society an thawh puinaah leh an thlawpna avanga tun dinhmun thleng thei an nih thu a sawi bawka a ni.

Aizawl Mosque hi kum 1966 March Ni 5 khan a lo kang tawh a. Aizawl Mosque Committee President ni thin Pu M. Bakhtar Uddin Majumdar kaihhraina hnuaiah a sak hna hi thawh that leh a ni a. Vawiin Eid-Ul-Fitr trawngtai rual hian Mizoram Muslim Welfare Society member 3,000 chuang an kalkhawm a. Pushpak Mosque-ah mi 500 chuang leh Sairang Mosque ah mi 100 atanga 150 chuang an kalkhawm bawka a ni.

(Corr - Engmawii)



CORPORATIONS

Mizoram sorkar hnuai a sumdawng tura din corporation hrang hrangte enkawlina atan sorkar chuan kumtin cheng vaibelchhe 21 leh nuai 52 chuang a seng thin.

Mizoram Khadi & Village Industries Board (MKVI Board) enkawlna tana kumtina Mizoram sorkar sum sen chu cheng vaibelchhe 13, nuai 20, sing 3 leh sang 5 a ni a, Zoram Industrial Development Corporation Ltd. (ZIDCO) tan cheng nuai 401, sing 7 leh sang 8 sengin Mizoram Food & Allied Industries Corporation (MIFCO) tan cheng nuai 251 leh sang 9 a seng a ni. Zoram Handloom and Handicrafts Development Corporation Limited (ZOHANDCO) tana kumtina Mizoram sorkarin sum a sen chu cheng nuai 164, sing 4 leh sang 7 a ni a. Mizoram Agriculture Marketing Corporation Limited (MAMCO) tan kumtinin cheng nuai 14, sing 4 leh sang 7 a seng bawk.

MKVI Board hnuaiah hian hnathawk mi 126 an awm a, ZIDCO-ah 32, MIFCO-ah 25, MAMCO-ah 17 leh ZOHANDCO-ah mi 15 an thawk bawk a. Sorkar tana pawisa thawkchhuak tur an nih lai-in Mizoram sorkar hnuaia a corporation-te hian an hnuaia thawkte hlawh tur atan pawh sorkar sum (share capital) a pek ziah a ngai a. Sum thawh chhuah chu sawi loh kumtina sum tam tham tak an hloh reng avangin kum 2008 khan an chungchang zir chiang tur hian sorkar chuan Deloitte and Touche Consulting India chu a ruai a. Deloitte hian rawtna siamin MAMCO, ZENICS leh ZOHANDCO te chu thiat turin a ti a. MIFCO chu mimal kuta hlan (privatise) a ZIDCO chu thuam that (revamp) turin a rawt bawk. Hei hi kalpui mek a nih lai-in sorkar lo ding thar chuan a ngai a kalpui zui-in ZENICS tih loh chu sum tam tak hloh chungin sorkar chuan a la kaltir ta reng a ni.

Hetih lai hian ZIDCO bik hi a kal zelna turah tun ZPM sorkar hian hmachhawp hrang hrang a nei niin official-te chuan an sawi a. Chief Executive Officer/Managing Director hi Mizoram sorkar hnuaia officer ten an kawp thin a, ZPM sorkar chuan management lama mithiam State Bank of India a DGM thawk lai chu deputation-in a la chhuak a, ani hian ZIDCO MD hna hi nikum March ni 11 khan a zawm a. Hei bakah hian ZIDCO chu mahni a inchawm a kal thei turin sorkar chuan tuai thar a tum a, development banking anga hma la tura tih a ni a. Hmasawnna ruhrel din kawnga nasa taka kal a, sorkar laipui leh Mizoram sorkar hnuaia a hnathawktu Project Implementing/ Construction Agency ni a, project work te khawih theia siam tum a nih thu official-te chuan an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



EGG, MEAT

Artui a Mizoram a intodelh theihna turin Sorkar hian hma a la mek zel niin animal husbandry and veterinary department hotute chuan an sawi.

Vety department hotute sawi dan chuan Thenzawl a A.H & Vety. Farm Complex-ah Mega Egg Production Farm din tum mek a ni a, department in NABARD RIDF – XXX hnuaia Project sum cheng vaibelchhe 20 leh nuai 60 a hmuh atanga hmalak chhoh tur a ni, an ti a. He Project-ah hian arpui nuai khat vulh theihna tura duan niin Mizorama artui thar lam leh thianghlim tam zawk tharchhuah theihna tura ruahman a ni. Ruahmanna hi zawh fel a nih hunah Public Private Partnership (PPP) hmanga enkawl chhunzawm tum a ni. Sa a Mizoram a intodelh theih na'n north eastern council (NEC) hnuaiah Project pathum - Lungkawlhla sial inthlahpunna hmun (Mithun Multiplication Centre), Lengpui a tam thama vawk vulhna tur (Integrated Piggery Farming) ruahmanna leh Ailawng a tam thama vawk leh ar vulhna hmun tur (Integrated Piggery & Poultry Farming) te chu ruahmanna lian tham kalpui mek a ni.

